



Aningaasaateqarfiup aningaasaataasa ilaannit procentit qassit ukiumut atugassiarineqarsinnaasanersut erseqqissaavigineqarsinnaaqullugu Aatsitassarsiornermi Aningaasaateqarfik pillugu Inatsisartut inatsisaannut nr. 6, 5. december 2008-meersumut allannguutissamik saqqummiussinissaannik Naalakkersuisut peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq Naaja H. Nathanielsen, Inuit Ataqtigiit)
(Siullermeenera)

Tusagassiutit imaluunniit inuiaqtigiit annerusumik qisuariarfiginngilaat Inatsisartuni amerlanerussuteqartut ulloq 12. November 2013 aalajanginnerat kanngunartoq. Ulloq taanna Inatsisartuni amerlanerussuteqartut Siumumeersut, Atassummeersut Inuit Ataqtigiinneersullu aalajangerpaat, Aatsitassanut Aningaasaateqarfik qanorsuaq Naalakkersuisunit atorneqarsinnaassasoq.

Aalajangerneq kinguaassatsinnut kinguneqarnerlorujussuarsinnaavoq. Aatsitassammi piiarneqartut naaqqinneq ajorput. Tassa imaappoq, qaqikkutsigit takoqqinngisaannartussaavagut. Taamaattumik Aatsitassanut Aningaasaateqarfeqarnissaq isumaavoq kusanartoq, tassani katersorneqassapput Aatsitassatigut isertitagut, uninngasuutittalu erniaavi tunguinermut atortassavagut. Taamatut periuseqarnerup qularnaassavaa kinguaassatta aamma aatsitassanik iluaquserneqarnissaat. Tamannami aamma Aatsitassanut Aningaasaateqarfiup siunertaraa. Neriuppunga tamanna qularutigineqassanngitsoq. Tamannali ajoraluartumik Kalaallit Nunaanni Aatsitassanut Aningaasaateqarfik pillugu inatsimmi erseqqissumik allassimanngilaq.

Tamanna tunngavigalugu Inatsisartuni ilaasortap 2013-mi Ukiakkut Ataatsimiinnermi siunnersuutigaa erseqqissarneqassasoq Kalaallit Nunaanni Aatsitassanut Aningaasaateqarfimmi tunguinermut allanullu atorneqarsinnaasut tassaassasut erniat, uangut akisussaassuseqarluta aalajangiisartut qularnaarniassagatsigu kinguaassatta aamma tunguinermut akissaqarnissaat.

Ulloq 12. november 2013 Siumut, Atassut Partii Inuillu aalajangerput kinguaassatta qanoq atungaqarnissaat soqutaasorsuunngitsoq – partiit taakku pingasut Aatsitassanut Aningaasaateqarfimmut takkuttut aningaasat ingerlaannaq atortalerusuppaat.

Kinguaassatsinnut taamatut suusupaginninneq Demokraatini isumarput naapertorlugu kukkuneruvoq.

Una siunnersuut aqcutigalugu Inatsisartunut Ilaasortap Naaja Nathanielsenip partiit



akisussaassuseqanngitsuliortut pingasut naaperiarpai. Siunnersuuteqartup siunnersuutigaa, erseqqissarneqassasoq, Aatsitassanut Aningaasaateqarfimmi aningaasaatinit procentit qassit ukiumut atorneqarsinnaassanersut.

Demokraatini akissutissarput nalornisiginngilarput; isumaqarpugut 0 procent taamaallaat atorneqartassaasoq Aatsitassanut Aningaasaateqarnerup siunertarimmagu, aningaasaatit erniaavi kisimik atorneqartassasut.

Siunnersuut Aatsitassanut Ataatsimiititaliamut innersuupparput.